

**Jhung" Zoug: Moo" VooJang"
Lacid Nu" Yi Myo: phyang" Da: Phoug"**



Dang: Vhu"= Jhung" Zoug: Moo" Voo: Jang"

Lhid" su: = Goyhoem: Boem Yeing"

Solhoo: = Latung: Khoo" Cang" yo' Coem Loid Tu" No

Myeing" = Lacid

Lheing: = Xangshid" Lheing:

Ayo' = October, 2023

Title- Jhung" Zoug: Moo" Voo: Jang"

Writer = Bawm Ying Mading

Illustrator = Hkaw Chang Latung and Tu Nan Sumlut

Original Language = Lacid

Edition = First Edition

Time = October 2023



CC BY-NC-ND 4.0

Attribution-NonCommercial-NoDerivatives 4.0 International

This license requires that reusers give credit to the creator. It allows reusers to copy and distribute the material in any medium or format in unadapted form and for noncommercial purposes only.

Akeu primer © 2023 by Kwe moo is licensed under Attribution-NonCommercial-NoDerivatives 4.0 International. To view a copy of this license, visit <http://creativecommons.org/licenses/by-nc-nd/4.0/>

DANG: PHANG

He: da" Mhoomyid: gi: 30.7.2023 ayo' moo: KBC Lacid
Jhoem: Phug Lhid" Cab vhu" shi: Sr. Goyhoem: Madeing Boem
Yeing" khyo" lhid" to" da" mhoomyid: nghoid da:. Lacid nu" yi
da" mhoomyid: moo: Voojang" gi: mau" pho" phung" yoeb voin
da" phoug" dayug nghoid ziri Lacid nu" yi nhoid, tid mhoomyid:
khyo" tid shab go" lo myang. Phoug" phyd" yi dayug yo' dayug
tid shab da" khyoo: dajhi' jhi' azhung" goo" lho: tid shab boem
ago" da:. He da" mhoomyid ri: Lugdeing: Kung: Mik moug mo
phoug" Goyhoem: Yeing Boem Soug: tid shab da" mhoomyid:
moo: ayang: xoug lho: gutu: myhi' mang: phoo' mang: bang:
myoo: sho' tid shab kyo" zi ri: we' xoem" yu lho: lhid" to" zi
nghoid. Voojang" da" pyaid ayo' gi: myid tu ayo (BC 256- 206
AD- Lahe: meing moo: Qin Khokham" (Qin Dynasty) bang:
Mung" dain: uebkhang" nyid da" ayo' yam" moo: bue" lai lo"
da" mhoomyid: nghoid ein: yo" soin too yu da:). Phoug"
Voojang" khyoo: gi: mhoomyid: ein: tho' re" bue" lai lo" da"
mhoobui" nghoid da:. Myhi'/ phoo' yi dayham" se' ziyo' adu go"
khyoo: ajoeb byeung" da" khyoo: joem we' boo wa nghoid da:.
Jo deung da" khyoo: joem gyo" byug zi bo nghoid lang" doem
xo' lho: lho' joeb pyeung loo" wa shid re" he da" mhoomyid:
lhid" su: ri: xo tei" lho" tid poin" tid kyeing" pang" thoug khyoo:
ri: we' yo" koid wa zi nghoid.

AKHYOO" AGAIN

BEING: MOO" 1 - VOOJANG" KHU: LO DA" KHYOO:

1. KHU: RE" DA" KHYOO:
2. NGI SHI" AYO'
3. TEI" KHYO KHYOO:

BEING: MOO" 2 - ZALOO: BUE" LO AYO'

1. MANG: KHUNG" ZAIN: KHYOO:
2. VOOJANG" DA" BYENG CANG"
3. YUGPHOO' YHOEM: KOID BYID: DA" KHYOO:
4. SHEING: GYO' PHOO' YO' YU DA" KHYOO:
5. LAHI: YHE: DA" KHYOO:

BEING: MOO" 3 - LAHI" YO' SHAU" DA" KHYOO:

1. LAHI: MUNG" MOO: BUE" NYID DA" KHYOO:
2. VOOJANG" RI: LAHI: BANG: YHE: SHU" YU DA" KHYOO:
3. VOOJANG" RI: ZOUG: KHYING: YU DA" KHYOO:
4. VOOJANG" YUGPHO BANG: DOEM TAU" LO KHYOO:

BEING: MOO" 4 - DEING KHOO: VANG DA" KHYOO:

1. VOOJANG" VOOGUNG KHYOO: DOEM TAU" LO KHYOO:
2. LAHE: KHOKHAM" VOOJANG" RI: DOEM LO SHU" NHANG: KHYOO:
3. VOOJANG" LAHE: MEING: MOO: MEING DOEM YHE: ZAIN KHYOO:
4. VOOJANG" SHID: LO" DA: KHYOO:
5. VOOJANG" DA" ZASHANG: YI

DANG: SAID

BEING: MOO"- 1

VOOJANG" KHU: LO DA" KHYOO:

1. KHU: RE" DA" KHYOO:

Cung: dam ngayoo ga: da" joyoo moo: tungzoo: nu" yi nyid lo da" ayo' moo: Tungzoo: nu" yi nghoid da" Coem: Loid nu" yi:- Joinco' Latung: nu" yi- Lanham: Nu" yi yo' dage" tung zoo: nu" yi da" phoug" shoin" nghoid nyid da" Mayoug- Mayoug phyoug:- Phyoug byoo- byoo Yang:- Yang: loem: - Loem: Leig- Leig Deing- Deing Cid"- Cid" Kang- Kang Youg- Youg gyui- Gyuicung" – Cung" Cid_ Cid" Soo:- Soo: Loo:- Loo: Voo- Voo: Jang" (VOO: JANG") ga: da" byu lhung: dayug gi: myid: tu' ayo' BC 256-206 AD ayo, moo: khu: lo ga:. Hau: jo' yoo gi: Me' gyung: yo' Yo, gyung: ga: da" gyid lang: eig lang yau zueb da" jo yoo: moo: nghoid ga: Me' gyung: gi: moug zhung: mo lho: moug: pyi: khyoo: yau lo wigi: Yo' gyung: gi: moug pyi: mo lho: moug zhung: khyoo: yau wigi: zueb da" jo' yoo: nghoid ga:. Lacid nu" yi dayham" bang: da" phoug" shoin" nghoid da" Voojang" gi: byu lhung: dayug khyo" khu: loo su: nghoid da:. Voo: Jang" gi: Phoo' Soo: Loo: Voo yo' Myhi' Joinco' Zafoem mo khu: lo ga:. Nyang: ri: yo" khu: yo' nya: yhid Zafoem gi: shid: loo" byug ga:. Hau: thang: amyang" ri: nya ba" we cang shid: lo" byug yoomo voogung byu bang: gi: Voojang" ri: myhi' phoo' zo: da" zooshang: ga: wigi: angei boem nghoid ago" da:. Subi" voogung bang: age khyoo:tid loug we' nya: phyid" Coem: loid Zafoem gi: myhi' yo' phoo' shid: cau" takho' da" nya: myid: Voojang" ri: atho' tid jheddab ziyo' asho" ajhen: khu: gyi: kaid ga:.

Dayam" myhi'/phoo' bang: shab zi gi: nya: mang: Voolang" ein: da" nya: mang: dayug gi: dajhi' gyi: bye yoomo myhi' phoo' shid coug" kho thang: moo: yhoem: mo lam" thu' lo" byug ga: shab boem da:. Phyid" Coemloid Zafoem gi: gye yeig:

da" su: nghoid wigi: sho" jhen: loug we' Voojang" ri:
galhoo: zho" jhug goin cung: khu: gyi: kaid ga:.

2. NGI SHI" AYO,

Voojang" gi: khu: re" nyid" mo nya: phyid" mo lai lho:
hang" we' nyang: ri: ajheddab ziyo' zooshang: ayo, moo: we'
asho" ajhen: sube" ze anoug ashoo" join zo: ung: zo: ziyo' nyid
lai lo ga:. Gungkhyang gyi: myhang: yang" zain ziyo' nheig
loem: emyed khyo' nyhoem: wigi: nheig boo ung: gyeung: da"
zooshang: dayug bue" lo da:. Zakyoo" ayo, mo wigi: shoo"
shoo: lhid thung: wigi: nya: phyid" ri pang" thoug ziyo nyid gyi:
lo ga:. Voo mo byencang" yi yo' shoo" shoo: lhid thung: yhi:
loug we' sube" lhid moo: amyi" loug we' voojang" da" lhid moo:
gi khanham' we' byeing" sho' sho' myi" da:. Nab, khang" moo"
lhid yu" yhe: ri: gootu: zooshang: yi gi: gungkoem: Voojang"
gi: aoung: vu, lasho' sho' vu, lo da:. Hug: lang" voo mo nyang:
yo' lhid dage" yhe: thoung: da" Coem: Loid Join: co' nu" yi ri:
nyanu" da" myhi' phoo' bang: gi: (khasu wigi Voojang" te" su:
lang" shoo" yo" ri: nanu" gi gung koem: lhoung tau" lo boem
lha?) Ga: nheug yo: zi shau" boem ago" ga:.

Hug: yoomo nyangnu" gi: tei" khyoo' loug we' voojang"
khyo, da" anam moo: za goem: sho' sho' cang khyo, boem
ago" ga:. Nghoid loug we' thang: nab kyoo' yhe: yu" lang"
Voojang" tei" mooza: damyi" jo, jo, bue" wigi byencang" yi
mau" wigi voojang" gi: byu lhung: dayug nghoid ga: se' myang
lo boem ago" ga:. Lo" thang moo: Coemloid Joinco' nu" yigi
nabsoin" no, no, mo Voojang" lhid yu" ayhi: shi" ri: shid khyoo:
yhe: wigi: Voojang" da" tei" moo: myi" to" da" ngho' zoo: yen"
zoo: jhoem ri: yhe: phid: wigi: nyangnu" da" tei" moo: yhe: tei"
to" lho: nyangnu" da" tei" moo: myi" khyo" khau" koid boem
ago" ga:.

Voojang" gi: nya: tei" mo khau" lhoid phid: yu zi se' da:.
 Nyang: ri: alheing: lheing: coem baid shen" ziyo' age khyo" aja:
 ja: koid wigi rhui zo: da" byencang" bang- voogung bang: ri agi
 akoid looza: khyo' nyhoem: lho: nyid yab gyi: lo ga:. Subi"
 khayhi' oung: zoo: loug we' Voojang" gi: mau" pho" xoid voin
 kyoem" voin da" yug- phung" yoeb bo da" zooshang: bue" lo
 ga:. Voogung byu bang: voojang" ri: soung oung: zo: yoomo
 voojang" nya: yugphoo' seing: dayug za: Voojang" ri nheig
 khyeug goem loem byid: ga:.

3. TEI" KHYO, KHYOO:



Danyid" ri: voogung mo zalang: yam da" yugzoo: bang:
 gi: Voojang" ri: ngho' myhi' re" lhong: ago" ga:. Nyangnu"
 voojang" ri: re" lhong: zigi: voojang" ri: jheddab lho:
 anghoid voojang" boo lang" she' shoo" shoo: lhid thoung: ri
 je lhong yo" ziyo' voojang" da" tei" moo: myi" da" seyoo
 goug: nyhoug joem ri khau" yu nau yoomo nghoid da:.
 Voojang" we' bo cang yhe: wigi seyoo moo: ju" lang"
 nyangnu" gi seig do, yo" do, bang: nghoid wigi seig phyoo"
 moo: do, wigi lhid lo" thoung: ago" da:.. Voojang" gi: ngi shi"
 wigi seiggam gyid" myidjang: moo: za: tei" cang khyo, to"
 ga:.

Thang: nyid" nabsoin" rigi Voojang" yhoeb atoo shi" ri nyangnu" gi no, mo yhe: yu" uri nyangnu" da" tei" moo: gi ci: amyi" too" voojang" da" tei" moo gi Shoodid: dadu: myi" to" wigi nyangnu" gi: Voojang" tei" mo phid: yu lho: nyangnu" da" seiggam tho' mo da" tei" moo: yhe: tei" lhang" to" wigi: Voojang" ju" ri" lang" seigphyoo" moo: shoodid: tei" lhang" to" zi myang wigi nga" tei" mo nanu" khau" yu ga: tid da:.

Hau: uri nyangnu" gi anghoid ga: tid wigi nang ngoonu" ri khoug" zhoug yoomo nang ri youg: foin: wa – ngoonu" ri khoug" zhoug yoomo nang ri youg: zhug wa ri" we tid goo" shang ga: kyug boem ago" ga:. Voojang" gi: nya: thang: khyo" bo tid byid: wa shid re" dayug ri: lhung: loug we' anau bo tid byid: nghoid ago" ga:. Lo" thang nya: yug phoo' seing: za: Voojang" ri: nheig khyeug wigi: cang ri" wa yhi: lang" we' ein: tid kaid ga:. Voogung suyem" joem moo: ju" lo" da: uri khoug" bang: thang: khyo" gi ngei yoo" sheing: yoo" bang: za: nghoid yoomo suyem" zakho' myoo: sho' bang: gi dajoem dayoo re" nyid to" wigi Voojang" thang: moo: gi: hang" we aboo nyang: kyeing" za: asho" ajhen: re" yab, jo, ga:. Nya: yugphoo' seing: cang ri" wa ga: su: we' phyed aju" ri" wigi nyang: boug" za: bue" jo, ga:. Hug: yoomo voogung bang: gi: Voojang" gi voo zoug: thoem" zoug: nu" bang: ri khoug" zhoug yoomo Voojang" ri youg: zhug wa khyo" tid boem ga:.

Voojang" byid: wa ziyoo ayoo" lang" join koid ca" wa khyo" ga: tid go" nyid boem ga:. Hau: uri Voojang" yugphoo' seing: gi vang re" lo wigi (e.. phoug" myang: da" mang: nhung" myhi' phoo' zoug: bang: we" ngoo nga" zaoug: voojang" thang: khyo" bo tid wa ein: re" lo uri khyoo: yam sacco: yoo moo myi: nge" nyid zi re" myang wigi joem" yo' gyid yhe: kham: lho: myi: said nyid yoomo thang: gyo" zi

nghoid yaboo khyoid byid: shi" ge') ein: tid ga:. Hug lang" Voojang" ri: coeb zoo: wa ga: tid sham: go" to" bang: gi: (ngoonu" bain sham: phyed too" bye: nang yinoug are" tid nyid ..khanham sacoo: yoo moo: myi: dab, khanham joem" mo gyid yo" kham: de ... nang ajo ateng age bue" khyoo: ri are" tid nyid) ein: tid boem ago" ga:. Hug lang" Voojang" yug phoo' gi: (Nangnu" ngoo tid ziri ajoo age bui" zi atid ga: ri: gi: ... myidjang: moo: danyid da" Shoocid: gi: khasu" wigi seig phyoo" moo: se' lo" ge myi" wa lha? Myidjang: moo: nyid da" shoocid: gi: myidjang: moo: khyo, to" da" Voojang" tei" moo: myi" zi danghoid) ein: tid ga:.

Hug: lang" Voo suyen" bang: gi: ci: we' ayo" tid byug loo: wigi voojang" oug: tang: ri: soem" lo" byug ga:. Voojang" koem gi: atarha" da" khyoo: koid bang: ri: yoboo khyoid byid: ein: tid lho: tau" lo boem ga:. Voojang" gi: danyid" yo' danyid" gungdu: gyi: lo wigi nheig bo lho: moo" jhug zoug: (loem: lug,) da" yugzoo: bue" lo ga:.

BEING: MOO" – 2

ZOOLoo: NU" BUE" LO DA" AYO.

1. MANG: KHUNG" ZAIN: KHYOO:



Voojang" gi: danyid" yo' danyid" gungdu: gungkhyang gyi: myang: lo lho: yoem: ge ziyo' xoid voin kyoem" voin da" zoolu: nu" bue" lo da:. Nyang: gi: phung" yoeb voin da" su: nghoid yoomo dalheing: lheing: gi: gougnyoug joem da" dang: ri we' se' gyo: ga:. Nyang: gi: thung" zhug loug we' wimdo, gye vang wigi mangkhung" zain: loug we' shoo" gye yo" ga:. Voojang" shoo" yo" ga: zi shoug" gyoo: khang" moo" voogung bang: gi: joem" dung: joem voin wigi shoo" jhoid jhoid re" yham" voin phang: loo" loo" koid ago" ga:. Voojang" gi: subi" avho: da" vhu: za: deung jo, ziri shab voin loo" loo" koid ga:.

Danyid" ri Voojang" thoung: to" da" mang: khung" moo: 27 zain koo: bo da" voo jung dadu: baid to" ga:. Hau: khyoo: ri voogung bang: shoug" gyoo: lang" davo bang: zeung: re" lo wigi shoo" bain sho' re" zain: voin lo" lho: vu, vhu: za: teung too" kho' ago" ga:. Voojang" gi voobyu bang: bain lo" thang: ri vu, vhu: koid: voin wigi vooyam gyid lang moo: vu, vhu: yhe: shab nyid ga:.

Vhu: shab nyid da" uri Mainjung: dadu: gi vhu: re" ngaid shi: zo: wigi Voojang" vhu: shab sham: coin" yo' yo" thau" said yu ga:. Nyang: mainjung: yo" thau" said to" khyoo: ri: voogung moo: lo" doem tid kyoo" lang" voogung bang: gi: doem jen re" wigi shoo" bain sho' re" doem zain: voin lo" wigi: vhu: za: doem teing kho' ago" ga:. Voojang" gi mainjung: vhu: doem shab uri gi moug: coid lo" ayo, ju" wigi: pyoeb sid gye ngaid ga:. Vhu: shab nyid u" pyoeb ngaid yoomo gung khyi khang" moo" moo: kyin: yoomo yhoem: doem ju" lo" lang" nya: phyid" Zafoem lhoem: yu" ri dagung goin" sheing: koem: zi lo ga:. Hug: yoomo phyid" gi mainjung: vhu: gi sheing: nghoid zi se' wigi eig phoug: matang: doem tau" yhe: lho: voo: thug phyed lho: mainjung: vhu: mo sheing: khyeig zheung" kaid yu wigi yhoem: moo: lo shung: to" ga:.



2. VOOJANG" DA" BYENCANG"



Voojang" rigi voo mo byencang" bang: dayug we' jhed jhed kug kug anau zoem" nghoid ago" ga:. Sho" jhen: yoomo gei sang: yu" nge ziyo' Voojang" ri mhoug zoo: gyam' zoo: join zoo: bang: za nghoid boem ago" ga:. Nghoid loug we' nya: yugphoo' seing: da" nya: zoo: Zoomoin gi nya: tho' re" apyaid dajhi' gyi: wigi nyang: ri nheig khyeug ziyo' sube" da" lo, wim oung: zo: jang" mo lhoung goem loem byid: khyoo: koid ga:. Voojang" gi: Zoomoin ri byencang" khyo" nya: bi: khyo" wigi gye jheddab nheig tei" ziyo' zoem" khau: nyid da:. Voojang" ri nya: yugphoo' seing: gi: nheig khyeug nghoid loug we' Voojang" yo' Zoomoin jheddab zoem" khau: khyoo: ri avhoo: bue" ga:.

Ngi shi" da" ayo, moo: zoem" khau: ziri agung yau nghoid loug we' zoolu: zamyi: bue" loo bye: yoomo nya: yug phoo' gi: gung youg yau da:. Khasu" wim gari: Voojang" gi: atho' tid sho" jhen: ziyo' byu myoo: sho' bang: oung: zoo: join zoo: shau" nyid su: nghoid yoomo nghoid da:. Hug yoomo Zoomoin ri Nya: Ba" gi voogung mo yoo" zo: da" yhoem: moo: byid: zhoo" nau nyid yoomo we' Voojang" yo' tain"

tab zoem" khau yoomo subi" avhoo: angei bui" wa ziri gung youg yau nyid ga:. Nghoid loug we' Zoomoin gi Voojang" ri je je lho: nheig tei" jheddab nyid ga:. Voojang" koem gi ci: ase' ziyo' nyang: ri: nya: bi: khyo" za: jheddab nheig tei" nyid zi nghoid ga:.

3. YUGPHOO' YHOEM: KOID BYID: DA" KHYOO:

Danyid" ri: nya: yugphoo' coemloid bang: gi Voojang" yoem: ge gyi: myang: ziyo moo" ze: yoem: kaid loem: loug re" ziri myang: wigi Voojang" ri: yhoem: daloem: koid byid: wa shid re" zoomyi: byid: wa ein: mhau' wigi yhoem: vu, nhang: ga:. Voojang" koem gi: anoug nghoid loug we' phyid" Zafoem gi zoomyi: byid: wa ga: yoomo Voojang" ri gyoo: sho' tid wigi yo" koid sho' koid wa khyo" tid yoomo nheig bo da" Voojang" gi: phyid" dang: ri: avoem" ngeug pyam' yoomo yhoem: koid wa gyo: ga:.Hug: yoomo nya: phoug: matang: asho" ajhen: koid wigi yhoem: vu, ago" ga:. Phyid" Zafoem nyang: we' atho' tid yoem: bo kaid ziyo' nya: myid: ri nyid" zang yhung zho" khyo" seig vu, voo: vu, de" khyo" atho' tid yoem: kaid lho: koid ago" ga:. Yhoem: koid nyid da" u" yhoem: koid lo, zoo" moo: yugpho' yhoem: bang: lakhuid" zeing gi: khuid" nu" soem" du: soid ga:.Hau lakhuid" nu" joem gi: nyid" khang" moo: Voojang" yhoem: koid lo, zoo" moo: lhu: ei" zoore dang: ji go" nyid ziri Voojang" gi gyo: xoem" ci: ga:. Hau: khuid" nu" joem tid go" nyid zigi (dadu: gi: ngoo gi yu myang lang" gyab wa ein: tid ga:- doem dadu: gi: Ngoo gi: byubeing" myang lang" gyab wa ein: tid lho: lo" thang du: gi: ngoo gi: sheing: myang lang" gyab wa) ein: tid go" nyid ziri: Voojang" gi yo" gyo: ci: ga:.Yhoem: bain koid thang: ri yhoem: vang: pui: gyag koid wigi: bain thang: ri: phyid" Zafoem gi: yhoem: vang jang: moo: yhe: lho: Voojang" ri yhoem: koid phoug" zoomyi: byid: lage ein: yhe: mho' ga:.

Hug: lang" Coem: loid bang: gi: ne" phoug: matang: ti" ci: we' ayo" zi nga" zoo: cikoid se' byid: wa – nga" zoo: ri voem: lhang" yo" zhoo" wazi anghoid hug yamo ayo" byid: ein: tid ga:. Ne" Phoug: matang: vho: ri: gi: gyam" thang: moo: lakhuid" nu" soem" du: soid to" jang" mo lakhuid" nu" dadu: vu, loo" ge' ein: tid kaid ga:. Phyd" Zafoem gi atho' tid nheigkug ziyo' Voojang" ri: lakhuid" nu" dadu: vu, ci: we' ein: tid uri Voojang" gi sheing: myang lang" gyab wa ein:: tid da" khuid" nu" ri vu, ci: lo" ga:.

4. SHEING: GYO, PHOO' YO" YU DA" KHYOO:

Damyen da" akhyeing: moo: Voojang" yugphoo' yhoem: koid jang" mo vu, lo da" lakhuid" nu" gi: myen" gamgung moo: yhoem: yam seiggam moo: yu" lho: gyab nyid ga:. Damyen goin" anoo: looza: dagyab nyid yoomo Voojang" gi: nya phyd" ri (nga" phyd" lakhuid" nu" damyen goin" dagyab nyid zigi: ce: noem nghoid la' yhe: yu" shang) ein: tid ga:. Hug: yoomo phyd" Zafoem we' to' wigi Voojang" yo' eig phoug: mathang: goin" yhe: yu" da: uri seiggam dagam gi: doug bo" bang nyid: lho: seyoo dakhoug: goin" bang jo, ziri yhe: myang ago" ga:. Hau: seiggam moo: tab tab yhe: yu" ri seig khung" khoug: moo: (atho' tid sho' yung" da" sheing: ngho'/ sheing: gyo, phoo' dadu: loung" to" ziri yhe: myang ga:. Hau: gyo, phoo' gi phyd" Zafoem myheig wa soin lang" dang: phang: lo" wigi: dakhyi' moo: lo" zhoung: jo, ga:. Voojang" yhe: myheig lang" za: yo" myeug ga:. Hug: lang" phyd" Zafoem gi voogung bang: se loo" wa ziri gyug wigi jhung: koo' dazeing lo" yu lho: agung mo kho' ga:. Hau: thang: ri akang yu pyam wigi akhoug: moo: kaid lho: lo" shung: to" ga:. Nya: phoug: matang: gi gye gau wigi phyd" zafoem gi: voogung mo Lahi: lhoung yhe: da" bang: ri: (nga" myid: Voojang" re' Lahi: bo shu" yhi: gala,) ein: cang tid yen" ga:.

Voogung bang: gi: (thui") ga: shikain" byi" ziyo' (ne" myid: Voojang" te" zi Lahi: yhe: ngoonu" Lahi: yhe: zigi: yhe: oung" zoo: wa loo: suid" loo: youg: ngei sheing: yo" lho: yhe: zi danghoid – ne" phoug: mathang: te" zi ci: we' ayo" zi – xam: we' anyham" zi- byi: mi we' ayo" zi atid nyid asho' gala) ein: nheig yo: boem ago" ga:. Nghoid loug we' phyid" Zafoem gi dayug thang: dayug yoem: ashoin: cang tid yen" ga:. Lo" thang moo: Voojang" nya: yugphoo' seing: gi: Voojang" ri: nheig khyeig wigi (nab yoo sang: phe: nyid" Lahi yhi: wa khyo" khau" soin too" ge') ein: tid ga:. Phyid" gi: gye gau ziyo' Voojang" ri: Lahi yhi: wa khyo" lo tid wigi khau" soin lho: nya: yugphoo' bang: Lahi: yhi: wa ziri khau" lang" nyid ago" ga:.

5. LAHI: YHE: DA" KHYOO:

Nya yugphoo' seing: gi: voojang" yo' phyid" Zafoem atheing: theing: tid myeing nyid ziri aoung: gyoo: yoomo voojang" ri: Lahi: yhi: lang" bo jhu" yhi: shang ein: nya: mangnhung" bang: ri: tid ga:. Nyang nu" gi: (hug: te" anyhoin: athoung" da" Voojang" ri: Lahi: shu" yhi: hang" se gyoo: wa kheing" yoem" - sho' thu - yhe: oung" zoo: wa zi we' ce: ayo" zi - ci: koid se' shu" yhi: wa lha? ... ayo" shu" yhi:) ein: tid boem ga:. Hug: yoomo nya: yugphoo' gi: Lahi: yhe: da" nab soin" moo: Voojang" ri: thang: moo: zheig zheig khau" cang ri" we' ein: tid kho' wigi so" thu' lo" ago" ga:. Seyoo moo: noo: khang" moo" voem: yhung zoo: lang" nya: yug phoo' gi: nya: voem: keig daceing ri: dadu du ceing wigi thang" bei" gyid" moo: shung: takhoo' khoo' koid ga:. Voojang" gi: nya: phoug: matang: nyhoem" to" da" sheing: thug ri nya: phyid" gi: voo: lo, lham: dung: akhoug: moo: kaid byid: lho: lham: dung: koid ci: nhang: ga:. Sheing: gyo, phoo' rigi jhung: koo' zeing khoug: moo: kaid wigi voin yhi: nhang: ga:. Voojang" gi: sheing: thug-sheing: gyo, phoo' ci: wigi nya: yugphoo' bang: so" lo" thang:

moo: amyang yang: koid lho: cang yhe: lo" ga:.
 Myen" lang" nya: yugphoo' bang: yhoeb da" anam moo: gau"
 yhoeb wigi nya: yugphoo' seing: da" voem: keig daceing yu zo:
 lho: Lahi: ju" sho' cang yhe: lo" ga:.. Lahe: mung" moo: ju"
 lang" nya: yugphoo' bang: gi: Lahe: zoug: yhoem: moo: vang
 lo" wigi yhe: theing: boem ago" ga:.. Khasu" wim gari hau: da"
 apyaid moo: Lahi: bang: gi being" voo ri voogung moo: ashoeb
 looza gyi zoo: nyid da" zoug: yhoem: moo: galhoo: tau yu lho:
 being" voo bang: voin da" ziyoo bain sho' ri: zoug: moo" yi yo'
 ngei sheing: myoo: sho' yo" da" bang: shi" yu" khyen: qei yu
 thang: ri: za: voogung khyoo: nhang: boem ga:.. Hug: yoomo
 being" voo bang: gi: gyi zoo: bang: nyid da" zoug: khokham"
 vang" moo: yhoeb theing: ca" zi nghoid ga:.. Voojang" gi:
 vooyam seiggam poem: moo: nya: jidmoo" mi gang" lho: yhe:
 zhoung: yhoeb jo, ga:..Phyid" Zafoem gi: nya: myid: yhe: lo"
 da" thang: ri: gi: nyid" khang" moo" yhoem: pain pheilhoeb
 boem shoem" sain wigi: nga" myid: voojang" nu: - myang: soid
 gain myoo: sho' qei she: loo zi nghoid ein: tid nyid ga:.. Hug:
 lang" voogung bang: gi: shikain" byi" lho: (thui" ... ne" myid:
 voojang" te" su: khayo nu: - myang: ziyoo se' qei loo: wa...ci:
 we' ayo" zi ... mang: zoo: nang gi foin" bye: nghoid da:) ein:
 coem juang" boem ago" ga:.. Voojang" gi: phyed aloo wigi yhe:
 myang" nyid byug yoomo nya: phyid" gi: nyang: ri myid seing"
 kho" nyid ga:.. Nyid" khang" moo" kha: u" lo la' ga: pheilhoeb
 shoem" sain wigi lang" nyid ga:.. Phyid" Zafoem yo' dayhang: ti"
 Voojang" ri atho' tid myid boin: nheig kyoo" kyo" wigi seing"
 kho" ngoug byid yo' lang" nyid su: gi Zoomoin nghoid ga:..
 Voojang" asho" ajhen: ci: we' asi' su: - Lahi: moug: we' aju"
 yu" su:- myeing" we' asi' su: - subi" bang: we anau shu" yhe:
 jang" moo: cang yhe: lo" yoomo Zoomoin gi: atho' tid loo:
 Voojang" ri: seing" kho" ziyo' lang" ngu" nyid ga:..

BEING: MOO" - 3

LAHI" YO' SHAU" DA" KHYOO:

1. LAHE MUNG" MOO: BUE" NYID DA" KHYOO:

Hau: apyaid moo: Lahe: mung" moo: mung" vhoeb da" khokham" yo' gyi phung: bang: gi: mungdain khoug: moo: goemlu to wigi thoughteung phung: bang: ri ayo" oung: wigi mungdain byo, wa ti" ti" bue" nyid da" ayo, nghoid ga:. Thoughteung phung: bang: gi: damyen lang" davoo voo re" phyo, sain' pyam pyam koid ago" ga:. Khokham" gyizoo: bang: khayhi' yoem: kaid lho: zain: loug we' ayo" tho' oung: wigi mungdain khokham" zoug: moo" bang: gi: atho' tid myed myo: gyug ci' shau" nyid da" ayo, nghoid ga:. Hau: uri Lahe: da" boid phyed lapi: bang: gi: boid phyid uri nyangnu" da" voogung moo: xoid voin kyoem" voin wigi phung" yoeb bo da" byu dayug thu' loo wa hau: yug, ri galhoo: lhoem: koid shu" yu lang" thoughteung bang: ri yo" oung: lho: meing: pyo: loo: wa ein: yo" phyid thu' to" wigi hau: mau" pho" byu ri lang" nyid boem ago" ga:. Danab rigi khokham" vang" moo: gyo, toin: da" thui: gi (vooyam moo: being" gi bo... vooyam moo: being" gi bo) ein: toin: nyid ziri boid phyed lapi: bang: gi se' gyo: yu ago" ga:. Hug: yoomo nyang: nu" gi: boid galhoo: doem phyid yu" uri nyangnu" lang" nyid da" mau" pho" phung" yoeb bo da" byu gi nyangnu" da" vooyam moo: ju" nyid ziri yo" phyid thu myang ago" ga:. Hug: lang" nyangnu" gi: zoeb phung: koid wigi khokham" phoo' tid zigi (he: byu rigi ngoonu" jang" moo: yo" shu" nyid sho' yhe: lhong: yu shang" – nyang: nyid wa da" yhoem: jo, yoo soin nyheung ge' - zoo: wa shug wa zi ge thang khyo" soin nyheung too" ge- nyang: ri: yhe: shu" wa shidre" ge thang pain" deing: myu" yhi: wa khyoo: shoem" sain ge- nyang: ri yhe: tau yu wa shid re" yung" thang myang: rheing" yo' zeing phung: bang: ri khe: lho: soin' nyheung ge')

ein: amyeing" khyo, kaid ga:.

2. **VOOJANG" RI: LAHI: YHE: SHU" YU DA" KHYOO:**

Khokham" amyeing" khyo, kaid bye: yoomo Lahi: bang: gi: hau: mau" pho" byu ri: cang sho: myid: yen" uri tung meing: mo re" da" being" vo bang: ju" nyid ziri se' wigi nanu" da" thang: moo: byu gootu: abo cang ri" la"? ein: myid: uri gootu: bang: gi: hang" aboo: loo: ngoonu" bang: za: danghoid ein: tid boem ga:. Hug: lang" Lahi gi: anghoid ngoonu" boid phyid myang too" bye:. Ngoonu" da" shid re" being" gi dayug gi: vooyam moo: ju" nyid ein: tid lang" Voojang" yugphoo' seing: gi: (e" ... myhi' phoo' yi we" asho" ajhen: ci: we' asi' ase" sei" da" nga" zoo: oug: Voojang" nghoid la') ein: tid ga:. Hug: lang" Lahi: bang: gi: hau: yug nyang: nghoid wa bye: yhe: shu" yu shang ein: tid ga:. Houg: lho: zeing baid mang" thoung" gyiphung: yo' zoug: khokham" yo' – yung" thang pain" deing: myhu" wigi vooyam khyoo: sho: yhe: lo" boem bye: ga:. Vooyam nam moo: ju" rigi seiggam poem: moo: jidmoo" mi gang" wigi ase" sei" zi – shen" u' anham: nham: zi zhoung: kuid" jo, lang" ga:. Nya: nam moo: gi jhung: koo' dazeing yo' voo: lham: dung: daloem: jo, to" zi myang wigi voothug phang yu" rigi sheing: byeing" sho' bo lho: jhung: koo' zeing vu, kaid ri: go, lo" wigi hau: go, jam" mo dameing: goin" doug: bang lo wigi nya: yugphoo bang: we'- Lahi: bang: dangain" gi: mau" byug boem bye: ga:. Hug: mo Lahi: bang: gi: gau wigi (e" Ngoonu" lang" nyid da" mau" pho" byu ri myang bye: ga: atho' tid gau ziyo' zeing baid mang" thoung" jikhoin" khoin" wigi Voojang" ri khokham" vang" khyoo: shu" lo boem bye: ga:. Khokham" vang" moo: ju" lang" nya: shid re" soin' nyheung to" da" yhoem: moo: ju" lo" wigi pui: zeing koid wigi lhoem: tau yu boem ago" ga:. Lahi: khayhi goug loug we' Voojang" gi: dang: dakhoin" we' atid moug" za: mau" nyid ga:.

Nyang: voin re" da" sheing: gyo, phoo' ri: ngei khamyoo' vho: ein: myid: ri ci: atid – vhu" loem za: kyin: nyid yoomo Lahi: gi: (nyang: gi: xam: myhoo' vho: ga: zi nghoid) ein: soin: yu lho: nu: -myang:- ngei- join ri: nya: xam: khaid nghab lho: xam: khaid myhoo' nyang: byid: lho: qei yu ga:.

3. VOOJANG" RI: ZOUG: KHYEN: YU DA" KHYOO:

Voojang" Lahi khokham" vang" moo: ju" nyid uri Lahi: khokham" gi: thoug theing phung: bang: ri meing: zain: oung: lo ga:. Nyangnu" boid phyid to" ziyo' dakhyoo" ti" Voojang" ju" ri" mo meing: zain: oung: lo yoomo, Voojang" doem lo" byug lang" nyangnu" meing: zain: doem soem" loo" wa ein: myid soin: ago" ga:. Hug: yoomo nyangnu" gi: Voojang" ri: aloo" nhang: looza: khasu" shu" nyid wa la' ga: myid: yau: nyid boem ago" ga:. Hug: yoomo Lahi: bang: gi: Voojang" zoug: kyoem" voin la' si' nau yoomo zoug: khyen: pui: koid wigi zoug: khyen: phung: moo: voojang" ri: bo loem" nhang: ga:. Voojang" yo' dage" nya: yugphoo' bang: we' Lahe: mung" mo da" zoug: moo" zoug: zeing yi' yo' di zoug: bang: we' bo vang khyen: boem ga:.

Jhoem' bid beug khyoo:

Lahi: bang: gi: nyang: nu" ri shu" vhu" wa zoug: khyen: byid: wa shidre" nyangnu" zho" da" yu ri tho: wigi boem mo lug, khyung: khoug: moo: zoug: khyen: bo loem" bang: bain sho' yab jen to" nhang: ga:. Boem moo: bid xain" ri" lang" phang to" da" duang: khyo" vang lo da" bid lo, xangshi" lo zang" su: gi: bid khyen: da" zoug: nghoid bye: ein: loem ago" ga:. Lo" yab jen to" uri nya: yugphoo' bang: yo' subi" gi: shid moo: yab boem ga:- Voojang" gi sube" nungthang moo: anau zi lo" yab jo, ga:. Bid thu re" uri gi xangshi" thu' re" da" bid gi lo" thang moo: yab to" da" Voojang" ngilang: moo: lo zang" ga:. Bain sho' bang: mau" wigi jhoem' shi" sain" lho: doem

khyen: yu" shang ein: sham: boem ago" ga:.

Jhoem' Shi" Sain" Khyoo:



Zoug: khyen: jang" moo: boo bang: bainsho' gi: zoug:
khyen: yab moo: hang" we' hang" da" byi: thang: kham: wigi:
yab jeng to" ga:. Voojang" we' sube" thang: moo: dajhi' hei"
lho: yab jo, ga:. Hug: lang" Lapi: phoo' gi: yu tho: lho: gye
jhoid da" jhoem' shi" ri: sain" kaid lang" hau: jhoem' shi" gi:
lahe: pain" byi: gi: jhoid wigi shid moo: yab too" bang:
dangain" da" byi: mo jhoid zain thu' lo wigi: lo" thang moo: yab
to" da" Voojang" jidmoo" byi: khyam" moo: ajhoid yoomo lo"
deung jo, ga:. Bain sho' bang: mau" wigi lo" thang daleing:
doem jham" yu" shang ein: sham: boem lho: jhoem' gyo, tang"
wa khyo" myid veung" boem ago" ga:.

Jhoem Gyo, tang" khyen: khyoo:

Zoug: khyen: bo loem" bang: bainsho' gi: yab jen to" jang"
moo: Damsa phoo' gi: yu tho: lho: gyo' phoo' ri: moug: moo:
tang" kaid lang" hau gyo' dang: gyo" lo wigi: lo zhoung: da" su:
gi: zoug: kyoem" voin su: nghoid ein: soin yu zi nghoid ga:.
Jhoem gyo, tang" uri: we' Voojang" gi: sabi" bang: yab da"
ayam moo: yab jo ga:. Gyo' tang" kaid uri: Voojang" vhu" loem
moo: za: lo zhoung: wigi Lahi: bang: gi: Voojang" ri: mau"
wigi: he: yug gi: gyeing" nyang: ngoonu" lang" nyid da" byu
nghoid bye: he yug ri: zoug: to' shang ein: myid veung" boem
ziyo voojang" ri: gungcid" byid: - byigi migi foid lho: - lahe lhid"
cab – juyhi: - khyoin ri: jhoug" byid: loo" bye: ga:. Nyangnu"
gi: Voojang" ri: adoem nhang: kaid laza: galhoo: goin cung:
jhu" nyid wa ga: nya: yughpoo' ri: tid wigi: voojang" da" nya:
phyid" ri: we' da: eig zain lang" lo shu" yu wa ein: pyeung: kaid
nhang: ga:.



4. VOOJANG" YUGPHO BANG: DOEM TAU" LO KHYOO:

Voojang" yugpho bang: gi: atho' tid mau" ziyo' Tung moug voogung khyoo: doem tau" lo ago" ga:. Voojang" ri: shu" loo" wa shid re" lahi bang: agyo: yoomo Voojang" nyang: we' anau zi nyang: boug" tung: bau moug: moo: nyhid: kho' yoomo nya: yugphoo' seing: gi: gye emyed angoin" ziyo' (yhoem: mo Phyd" Zafoem yo' Zamoin khayhi' lhoem: yoin" kug lang" wa la' ga: myed myo ziyo') tau" lo ga:. Voojang" yo' lahi bang: foin: kaid da" jhung: shug myoo: sho' voin wigi: doem lo ga:. Voogung moo: ju" lang" Voojang" khyoo: ri: lo tid kyo" uri: voogung byu bang: atho' tid mau" boem ga:. Voojang" ri: Lahi: bang: gi: meing: vhoebkhang" phajhi"- gyi zain: phajhi"- Lahe: lhid" cab- Shoo" zoo: shoo" shug phajhi"- aja ja ri: Goug: zain (dayham" myhi' phoo' yi 7 zain, 3, zain, 12 zain ga: shab boem) byeing" sho' jhoug" byid: lho: shu" nyid ga:. Voojang" ri: lang" nyid da" Phyd" yo' Zamoin koem gi: Voojang" ri: myed: seing" kho" wigi: koug shui: shau" nyid boem ga:.

Voojang" gi: kha:nyid" bid vang moug coid loo" loug we' aju" thu' lo yoomo phyd" zafoem yo' Zamoin gi: Voojang" ri: myed wigi: gye nyang: koug shui: shau" nyid ga:. Dazain thang: dazain myang" lo" yoomo phyd" zafoem gi: mang: lo" wigi: gung apyoo: bue" lo nyid ga:. Phyd" ri: yu" cung: wa byu ayoo" yoomo Zamoin gi: Voojang" gung thid phyd" ri: goin cung: wigi: voojang" doem loo wa ziri: lang" nyid boem ga:. Zain loem goug: zain myang" lo" thang: ri: phyd" Zafoem shid: noo no lo" nyid yamo nya: yugphoo' seing: gi: Voojang" ri: shu" wa shid re" lahe moug: khyoo: doem yhe: ga:.

BEING: MOO" - 4

DEING KHU: VANG DA" KHYOO:

1. VOOJANG" VOOGUNG KHYOO: DOEM TAU" LO KHYOO:



Nya: yugphoo' bang: doem tau" lo" thang: zain loem: nyhed zain myang" lo" thang: ri: Voojang" gi: lhid" cab se' – juyhi: se – gyi phajhi" – ngei sheing: atho' tid yo" wigi join myhi' /phoo' myoo: sho' yo' – gyizoo: moin khyo" yo" wigi Lahe: mung" goin" moo: myeing gyi: da" gyi: zoug: bue" nyid bye: ga:. Nyang: ngi shi" u" mo meing: zain jang" moo: nyang: boo lang" gi: meing: zain oung: oung: bue" wigi Lahe: Khokham" gi nyang: ri khain" pha khyo" meing: zain: jang: moo: shu" yen" ga:. Gyi: lo wigi gyi phajhi" juyhi: se' thang: ri we' hang" ayo" zain: oung: da" gyipui: moo: voojang" yhe: zain: lang" oung: doid khyoo: yo" wigi Lahe Khokham" gi: nyang: ri atho' tid jheddab wigi Khokham" vang" moo: nyang: ri tain" tab jhu" nyid lho: nyang: ri amyeing" akhang" myoo: sho' byid: to" ga:.

Nyid gi yab yo" da" zoug: ludaid myoo: sho' bang: we' Voojang" ri jheddab phoug" myang: boem ago" ga:. Voojang" gi Lahe: mung" moo: khayhi' myo, nhoo: yo" nyid ge loug we' nyid" khang" moo" nya: phyid" khasu" nyid la' – Zoomoin khasu" nyid la' ga: myid seing" kho" ziyo' khasu" ayo" tho' phang: khoo' yoomo myid apyoo: ziyo' nyid nyid ga:. Hugsu" nyid nyid da" uri goug: zain byeung" lo" thang: ri nya: yugphoo' seing: gi phyid" Zafoem kang: gyoo" noo no nyid khyoo: ri re" tid kyo" wigi Voojang" khasu" ase' koid yoomo Khokham" phoo' jhang" moo: yhoem: loo" wa shidre" soem" zain akhang" byid: lho: ca" da" zakhoo: gyi zoo: yi we' byen bo soin byid: kaid wa shid re" mho' ga:. Khokham" phoo' yo' Lahi: bang: gi: Voojang" lo" byug lang" nyangnu" yaukhi" zi doem shoug" wa thoug theung phung: doem thu' loo wa la' ga: gye: gyug gungyau boem yoomo avoem" nhang: ga:. Nghoid loug we' Voojang" atho' tid kougshu: ziyo' tid nyid yoomo eig zain lo" nyid lho: doem ri" byid: wa shidre" tid wigi ca" da" zi yoo jhung: shug myoo: sho' byid: wigi nhang: kaid boem ago" ga: Voojang" gi nu: - myang: ziyoo myoo: sho' yo' join myhi' / phoo' myoo: sho'- gyizoo: myoo: sho' yo' lo ziri voogung: bang: gi atho' tid mau" gau ziyo' lhoem: tau yu boem ga:. Zoomoin gi voobyu dangain" bang: shid moo re" yab to" wigi ngau ziyo' voojang" ri re" lang" nyid ga:. Voojang" ri myang lang" atho' tid gau ngau ziyo' lhoem: po: yu lho: nya phyid" jhang khyoo: jhu" lo" ga:. Phyid" gi: nya: myid ri lang" ase' yu" byug wigi atho' tid mau" gau ziyo' lhoem: po: ngau nyid ga:.Voojang" ju" yo' phyid" Zafoem gi nyang: kang: agyoo" shi" ri Zoomoin ri lo, xo' yu we' ein: tid yoomo Voojang" gyo: wigi dalheung: dam lo, xo' pui: koid lho: Zoomoin ri fang yu ga:. Voogung moo ju" yo' Voojang" da" gyizoo: join myhi'/ phoo' bang: gi: voojang" nyid wa yhoem: koid lho: goug nyhoug nyid jang: we' soin koid wigi

khokham" vang" ti" Voojang" yhoem: ri koid byid: ga:.
Voojang" gi: nyang: yu lo da" ziyoo jonu" yi – gugzoo shi" voo:
myoug: shi" jhoem dayam" ri voogung bang ri dayi" yi" gam
byid: ga:. Voogung bang: gi nyangnu" oung: zo: yu" nge lo da"
khyoo: ri yo" boin: nung ngham" yo" wigi nyang: ri: gyug ziyo'
re" goeb pid boem ago" ga:. Voojang" we' nanu" ri khanham'
we' yoboo axoem" too" ngoo ri: gung youg ayoug goo" ein: tid
lho: gye pyoo: sho' shu" nyid ga:. Nya: phyid" Zafoem ri: we'-
Zoomoin ri we'- Voogung bang: ri we' gye pyoo: sho' shu" nyid
ga:. Zoomoin ri bain fang yu thang: lham" moo" goug: khyab
myang" thang: moo: phyid" Zafoem gi: shid loo" bye: ga:.
Voojang" gi: nyang: khu: lo da" moug mo wigi: gutoo: aqei:
ayam khyoo: meing lo" zain wigi: Jhung" zoug khyo" lo nyid ga:
bidvang shoid khyoo: Labyid lang ri: lai phyid wigi: Labyid lang
yo' Myileig lang agyoo: akhuid" Jang" mo" lug koem: zang ga:
myheung da" jo yoo: moo: meing: zain: ju" lo" wigi: hau jo'yoo
moo: lo" yu" nyid nau wigi: Hau Jo'yoo moo: lug khyam: kyam
wigi: lug yhoem: zhoug lho: Jhung" zoug: (khokham" khyo"
nyid) khyo" lo nyid nyid ga:. Aqei: ayam goem: sho' khyoo: we'
bid vang shoid Gala meing: ju" sho' meing: zain: wigi kheing"
koid: zo: lho: lo nyid nyid zigi: Zain loem: nyhed zain myang"
lo" byug ga:. Voojang" gi: eig zain ein: yhoem: lo nghoid loug
nyhed zain ju" lo" byug ga:. Zoomoin mo yo" da" zooshang:
we' eig yug nghoid bye: wigi nyang: gi Lahe: mung" khyoo:
adoem tau" yhi: noug wigi nyid nyid ga:.

2. LAHE: KHOKHAM" VOOJANG" RI: DOEM SHU" NHANG: KHYOO:

Voojang" lo" byug thang: lham" moo" nyhed khyab ayo,
mo gi gyeing" gyeing" nyang: Lahe mung" moo: thoug theung
phung: bang: doem to lo wigi Lahe: Khokham" bang: gi myid
myoo: gyug pho" khyoo: doem shau" boem bye: ga:.

Meing: zain: we' aoung: bue'' wigi thoug theung bang: gi danyid'' eig nyid'' moo: davoo davoo wim gi zain: oung: lo boem bye: ga:. Hug: yoomo Lahe: khokham'' gi: khasu'' ase'koid yoomo voojang'' ri doem lo'' shu'' yu wa shidre'' jhung: shug myoo: sho' soin' foin: wigi lagyoo: phung: bang: ri nhang: kaid ga:. Voojang'' gi myi: yo' zoo: yo' gyi zoo: yo' meing: zain: lho: lo nyid zigi nyhed zain byeung'' lo'' thang: ri Lahi: Khokham'' nhang: kaid da'' lagyoo: phung: bang: gi: (jhung: shug' jhung: lang: myoo: sho' yo' ju'' lo wigi - zougmo'' Voojang'' we'' Lahe: mungdain: da'' vhu'' pid: lo, kyo' gi: ne'' da'' lo, moo: ju'' nyid bye:. Khokham'' yo' mung'' byu bang: myoo: sho' nang ri re'' pang'' thoug yu wa shid re'' lang'' nyid. Nang yo' ne'' yhoem: byu bang: bain sho' shu'' lho: cang: ri'' byid: we' ein: lo tid ga:. Voojang'' we' gye anoug loug we' Lahi: Khokham'' yo, mung'' byu bang: myoo: sho' nyang: ri gi koid to'' ziri: myid yu'' wigi nya: yugphoo' seing: ri we' – Zoomoin yo' yhoem: byu bain sho' re' shu'' wigi Lahe: moug: khyoo: doem cang: yhe: lo'' ga:.

3. VOOJANG'' LAHE: MEING: MOO: MEING: DOEM YHE: ZAIN KHYOO:

Voojang'' Lahe moug: moo: doem ju'' yhe: uri gyeing'' gi nyang: nyang: nyid kho' u'' ti'' anghoid mung'' byu bang: gye yaukhe'' ziyo' meing: apyoo: yoomo koug shu: shau'' nyid boem ago'' ga:. Hug: yoomo Voojang'' gi ju'' yhi: yo' nyid'' - myen'' meing: zain: yhe: wigi Lahe: Khokham'' yo' meing: byu bang: ri pang'' thoug yu ga:.Voojang'' Lahe: moug: moo: doem ju'' da'' ayo, dazain yam'' ju'' thang: ri Lahe: mung'' gi meing: yo'' zain: oung: wigi meing: doem pyo: loo'' bye: ga:. Voojang'' gi: yhoem: meing: moo: we' nya gyi phung: nyhid: to'' wigi Lahe meing yo' yhoem: meing so'' lho: meing: zain vhoeb khang'' nyid lo ga. Meing: zain: khang'' moo'' yo'' oung: wigi Voojang'' ri Lahe: khokham'' gi: atho' tid jeju'' boin: wigi nya: zoo: byid: zho'' lho: Voojang'' ri yhoem: byu koid yu wa soin' ga:. Hug: yoomo Voojang'' gi Lahe: Khokham'' zoomyi: ri: doem fang yu



wigi Khokham" zamo, khyo" meing: zain: zoug: moo"
 bue" wigi Khokham" vhoo: moo: amyeing" akhang" gyi: thang:
 da" zoug: bue" lo ga:. Lahe: Khokham" zoomyi: ri: fang yu
 thang moo gi Voojang" shidre" je ge lo nghoid loug we' nya: zo
 myhi' Zoomoin shidre" gi apyo: khyoo: bue" shid" lo ga:.
 Voojang" gi: shidphyang" yhang: ti" Zoomoin tho' moo:
 akhyeing: ayo" byid: ajheddab loo: bue" lo wigi Zoomoin gi:
 koug shu: shau" nyid ga:. Voojang" nyang: ri: golhoo' ayu"
 yhang: ti" koid wigi Lahe: khokham" zoomyi: riza: akhyeing:

byid: ziyo' Zoomoin gi: asho" ajhen: ci: asi' su: nghoid yoomo dalheung: lheung: Lahe: Khokham" zoomyi: da" yu" nge ung: zo: zi shau" lo ga:. Nghoid loug we' Zoomoin gi: Voojang" ri myid anoo looza: nyang: yo" ge bui" yhi' Voojang" ri goincung: jheddab goem loem ziyo' nya: tang: zooshang: yiri galhoo: jhau" mho' goin cung: lo ga:. Nya: nhung" bue" lo da" Khokham" zoomyi: ri we' jhed myid toin" shed wigi galhoo: ji doem zoem" khau: lho: gye pyoo: sho' nyid lai lo ago" ga:. Ayo' myang" lo thang: ri: zamoin gi: zoo: yi gyi: loo bye: yoomo tung meing: khyoo: doem tau" lo ga:. Zoomoin mo yo" lo da" zoo: yi gi zoolu: zoomyi: bue" lo wigi Lahe: meing: mo phajhi" juyhi: we' yo" jhau" si' nhang: bye: nghoid ga:. Zoomoin gi: Lahe: meing: moo: nyid yo, ri myonhoo: nge ziyo' Voojang" da" jheddab goin cung: khyoo: yoem: neing: ziri myang nyid yoomo tung meing: khyoo: nyang: khu: da" zooshang: bang: yo' shid ze lho: tau" lo zi nghoid ga:. Voojang" gi: Lahe meing moo: we tung meing: khyoo: we' meing: zain: wigi: yhoem: moo: tain" tab ayo" nyid looza: lo" lo" loo loo meing: zain so" yen" ga:.

4. VOOJANG" SHID: LO" DA: KHYOO:

Voojang" gi: Lahe meing: moo: zoo: khu: doo myhu: wigi myo, nhoo: phung" yoeb yo' apyaid sheing: sho' nyid lo ga:. Meing: pyo: lo thang: yoem: gi shi" u" ri: Voojang" gi: tung meing: khyoo: we' nyid Lahe meing: khyoo: we nyid wigi nyid lai lo ga:. Voojang" gi: apyaid sheing: sho' nyid kho' wigi Lahe: meing: nya: yhoem: moo: shid: lo" byug bye: ga: (dayam" myhi' phoo' bang: gi: India meing: khyoo: meing: zain yhe: jang" moo: yhe: shid byug ga: shab boem). Nya: da" gung paid ri: Lahe: meing: mo wigi tung meing: khyoo: yu lo wigi nyang: nyid da" voogung moo: nyhoeb shung: boem ga.

(Dayham" bang: shab tid zigi zoug: moo" Voojang" da" gung paid ri Lahe: Khokham" bang: agyo: yoomo Lahe: meing: moo: za: tung: moug mo yhoem: byu bang: ri: khe: yu wigi: galhoo: nyhoeb shung: to" ga:). Voojang" shid: lo" thang: ri thoug theung bang: doem thu' lo wigi Lahe: meing: gi byo, lo" byug wigi gootu: Khokham" bang: doem vhoeb khang" lo" byug bye: ga:. Voojang" nyazoo: yi mo Zoomoin ung: mo gyoo" bang: yo' Lahe: khokham" zoomyi: mo gyo" da" zooshang: dayam" bang: za: tung moug: khyoo: lo nyid wigi dayam" gi Lahe: meing: moo: za: Lahe yugphoo' bang: moo: ayang: nghe: wigi Voojang" da" myeing moo nghe: lho: nyid lo" boem wigi Lahi: bue" lo" boem ga: (Lahe: meing: moo: nyid too" kho' da" zoo: yi khamyhoo' yug nghoid ... myeing khasu" ga: ziri galhoo' ayo" se' byug loo: nghoid da:).

5. VOOJANG" DA" ZOOSHANG: YI

Voojang" gi: tarha" vang yhoem: seing: myhi' eig yug nghoid khyoo: riza: mhoomyid: shab boem loug we' gootu: yhoem: seing: myhi' we' ge bo zi nghoid da:. Yhoem: seing: myhi' mo yo" lo da" zooshang: yigi byid: zoo: khamyhoo' yug nghoid zi asi' Jang" Myoo: dayug za: Zang" boug" myhi' koid zi ri: shab boem ago" da:. Yug zoo: gi (8, 12,17 yug nghoid ga: dayham" bang: shab ago" da:) 14 yug nghoid boem ago" ga:. Voojang" nya zoo: bang: gi - 1. Jang" Boem (Boem Boem pheing:- Pheing: Go' – Go' Nu"- Nu" Yung" Galoug- Nu" Kyang" Madeing- Kyang" boug" – boug" foo' – Foo: Yoo- Shijhang: - Souglang"- Lhugseing:- Mangshang- Phari- Xoolang:- bang: da" nya: phoug" nghoid. Foo: Bung"- Madeing- Goyhoem:- Thoemsheing: - Lungbang:- Bidlhab- Mouggyoung bang: da" nya: phoug" nghoid. Myid youg" khyang: lhang: moo: nyid lo"). 2. Jang" lu (Lagyoem" – Thogo'- Phari'- Laguid: khung" moo: nyid lo") 3. Jang" Phyoo: (Bid lhoo' kung: Pado' – Langyang-

Ngolang khung" moo: nyid lo") - 4. Jang" Sham: (Voo' lhu" – Thoem" nyoug- Myang jung khung" moo: nyid lo") - 5. Jang" Se' (Do, bang" – Jang" moo" moo: nyid loo") - 6. Jang" Khyang' (Lahi: bue" lo" Ming kuang" khyoo: nyid yhe: lo") - 7. Jang" jhoug: (jhoug: gang" phyi: moo" moo: nyid lo") - 8. Jang" thug - 9. Jang" Myhoo: - 10. Jang" Foo: - 11. Jang" Shoo"- 12. Jang" Cid" - 13. Jang" Mhoo: -14. Jang" Cang: bang: nghoid ga:. Tung meing: moo: shab da" mhoomyid: moo: 8 yug da" akung: ako za: myoo: phyang" tid shab boem yoomo deing da" bang: gi: Lahe: meing: moo: nyid kho' wigi Lahi: bue" loo" bang: nghoid ein: ge myid soin: tu' yu wa zi nghoid da:. Voojang" Shid: lo" thang: ri xo' lho: Mang: zeing Kung gi Voojang" kyoem" ri: ci: wigi Meing: zoug: dain" zoug: khyo" join myoo: sho' yo' – Gyizoo: myoo: sho' yo' wigi: Meing zoug: khyo" kheing" koid zo lho: nyid lo zigi: Voojang" – Jang" Boem – Boem Pheing: - Pheing: go, - Go' Nu" – Nu" Kyang"- Kyang" boug" – Boug" Fu' – Fu' Bung" – Bung" yhi – Yhi: Yhu' (Zoug: Moo" Yhu') Ga wigi myeing gyi: lai lo" zi ri tid shab boem ago" da:. Nghoid loug we' Voojang" da" meing: zain: oung: da" Mung" dain: gi: khafi' ju' sho' nghoid ziri we' Voojang" anyid lo: thang: ri: Nya: zoo: bang: gi khasu" koid Meing: ri kho' ueb lo ziri we' Zoo: yi khamyhoo' xeig ju" sho' Kheing" koid: zo: lho: Meing: oeb lo ziri we' ayo" se' byug loo: nghoid da:. Dayham" myhi' phoo' bang: tid shab zigi: Bid thu' shoid Lahe meing: mo zi Gala shoo" no' Moug: ju" sho' meing: zain: wigi so" yen" khyoo: ri tid shab boem ago" da:. Phoug" Voojang" da" mhoomyid: ri: tungzoo: nu" yi akung" khang" moo: gye tid shab da" (Chyahkrai ma the La law ma ni) moo we' yo" myang wa zi nghoid da:. Voojang" gi: tungzoo: nu" yi da" jhung" zoug: moo" dayug khyo" nyid lai lo ziri: yo" myang zi nghoid.

ATHANG: SAID KHYOO:

Lacid nu" yi myoo: phyang" da" phoug nghoid nyid da"
Voojang" mhoomyid: khyoo: gi phoug" phyd" yi daxeig mo
daxeig ngi: shab zoo" re" ti shab gyo" lo da" mhoomyid:
nghoid da:. Dayug yo' dayug tid shab khyoo: azhung" go"
khyoo: myoo: sho' bo nghoid loug we' phoug" Voojang" gi:
mau" pho" byu- Zain loem: khyeing" khyo" lang" za: byu myu"
byu kung: myoosho' moo: dayug dage khu: thu' lo ja" byu
lhung: dayug nghoid ziri: gi: ayo" hi: wa nghoid. Tungcid nu" yi
moo: Voojang" yhang: ti" Khokham" jhung" zoug: dayug xoid
voin kyoem" voin da" zoug: moo" dayug nyid lai lo" ziri si' lang"
tungcid nu" yi we' mougmyid tho' byumyu" myoo: sho' nyid
jang" moo: zoug: Khokham" kyoem" voin da" byumyu"
byukung: dako' nghoid ein: ziri yo" se' yu da:. Voojang" zoug:
bue" zigi byu wigi khyen: zi anghoid bid wigi khyen: agyid aso:
wigi khyen: da" zoug: nghoid yoomo Voojang" da" zoodu
akung: ako' bang: ri: Bid Nham: bang: ga myheung lo zi nghod
ga:. Phoug" Voojang" da" mhoomyid: ri tungcid nu" yi xo' lho:
tid shab yhe: zoore" mhoomyid: shen" dam gyi: da" byumyu"
nghoid ziri voidyam" zoodu yi se' lo boem ca" da:. Mougmyid
tho' moo: tung cid nu" yi we' zoug: Khokham" kyoem" bo da"
byu myu" byu kung: nghoid ein: ziri tungcid nu" yi nheigloem:
moo: kaid ci: wigi: zoug: Khokham" byumyu" yhang: ti" se
jhang: bue" da" byumyu" bui" sho' yoem: kaid nyid yab yhe:
lo" boem shang.

Dang: myid:

1. Voojang" gi: emyed ge da" zooshang: dayug khyo" nyid lo la?
2. Emyed khyo, nyhoem: zi gi: Atain" (magrau ngrang ai) da" byu yi da" avoid nghoid la?
3. Voojang" gi: emyed gi su: nghoid yamo xoid kyoem" yoo" soo: bue" lo zi nghoid la?
4. Voojang" gi: nyang: ngi shi" ayo' moo: oung: zo: loo bang: ri: ci: wim doem bang" thoug da: lha?
5. Voojang" gi: meing: zain yoomo, byu said su: we' nghoid nyid yoo mo nyang gi byu gi dayug ein: myang la?
6. Voojang" gi: xoid kyoem" voin su: nghoid loug we' lahe: shid re" za: kang: dei lai lo ein: nang myang la?
7. Voojang" mhoomyid mo leig ge yu" yu wa khyoo: jhoem gi: ce: noem jhoem nghoid wa lha?
8. Voojang" mhoomyid moo: nang yoem: yo" thang da" khyoo: gi: kha: khyoo: khaid nghoid lha?
9. Voojang" mhoomyid: mo leig age yu" yu da" khyoo: jhoem ri: tid kyoo" we'.
10. Voojang" da" mhoomhyid: mo nang yoem: ayo" thang da" khyoo: ri: tid kyoo" we'.



Sheing: Lhamdung:



Sheing: Gyo' Phoo'



Voojang"